

■ COLUMNA

«Züri brännt» – era per tschintg Sursilvans

DAD ANDREAS CADONAU/FMR

In qual giadas esi da dumandar pertge ch'ins era gist da quel mument temp en quel lieu. Per pura casualitad sco per exempel ils 30 da matg 1980.

Tschintg giuvenis sursilvans viadi en in VW Käfer mellen en direcziun Turitg. Respectiv en direcziun dad Oerlikon, Hallenstadion. Il motiv: Bob Marley, musicist legendar da Giamaica, gia avant 40 onns il pli impurtant represchentant da Reggae. El era annuizià per in concert en Svizra, il sulet concert da Marley en Svizra. In concert cumpletmain vendì ora, passa 10 000 aspectaturs e tranter quels nus tschintg sin via en il VW mellen per taddlar ed udir in da nos impurtants idols musicals. «Get Up, Stand Up!» Natiralmain che naging na pudeva savair che Bob Marley moria strusch in onn pli tard en la vegliadetgna da 36 onns. Uschia che quel concert ha retschavì en il decurs dals onns ina nota speziala, betg la suletta nota speziala.

Dal medem temp che nus ans esan avischinads cun noss VW vers Turitg demonstravan passa 100 giuvenils davant la chasa d'opera per pretender in center autonom per la giuventetgna da la citad. Quella pretensiun aveva il cussegl da la citad renvià ed a medem temp concedì in credit da 60 milliuns francs per



Las revoltas dals onns 80 a Turitg han cumenzà ils 30 da matg suenter il concert da Bob Marley, han dentant cuzzà plirs mais a Turitg ed era en autras citads en Svizra.

FOTO BIBLIOTECA ETH TURITG / P. LÜTHY / CC BY-SA 4.0

renovar l'opera. Ina decisiun ch'ina part da la giuventetgna da la citad ha resenti per pura provocaziun. Quellas istorgias e tensiuns politicas n'avevan betg cuntanschi il vitg sursilvan, almain betg mai persunalmain. Ina emprima impressiun dad ina situaziun nunusitada avain nus retschavì curt avant Turitg. Il viadi tras la citad per cuntanscher il Hallenstadion n'era betg pussaivel, per via dad ina demonstraziun en la citad, sco igl è stà d'intervegnir. Il Hallenstadion avain nus tuttina cuntanschi e medemamain udì e vesì Bob Marley sin tribuna.

Puncto divertiment e sortida per giuvenils a Turitg era avant 40 onns il Niederdorf il «place to be». Uschia ch'ina visita en il «Dörfli» era part integrala dal plan da noss gir da concert. Blers dals passa 10 000 visitaders dal concert da Marley èn stads da la medema opiniun ed èn sa mess sin via vers il center da la citad ed èn fruntads là sin ina situaziun caotica. Dafertant ha la polizia vulì spaventar ils demonstrators avant la chasa d'opera, e la situaziun è escalada cura ch'ils visitaders dal concert èn arrivads. Donn da materials chaschu-

nads dals giuvenils ha la polizia rispundì cun ferma violenza. Mia emprima e davosa experientscha cun gas lacrimogen, da bragir en il vair senn dal pled. Las raschuns ed ils detagls dal uschenumnà «Opernhauskrawall» avain nus tschintg Sursilvans intervegnì in di pli tard dal «Blick». Ils embrugls da Turitg dals 30 da matg èn stads il signal da partenza dals protests da giuvenils betg sulet a Turitg, mabain era a Berna, Basilea e Losanna. L'onn 1980 cun ina stad chauda cun blers conflicts tranter polizia e giuvenils. «Libra vista sin la Mar Mediterra-

na» in dals slogans dad ina giuventetgna detg agila.

Natiralmain essan nus turnads sauns e frestgs cun noss VW enavos en Surselva. E la discussiun era lantschada. Jau vesel anc oz mes tat a smanar la bratscha: «Tge diavel has ti pers giu Turitg a demonstrar?» Il souvenir, in projectil da gomma da la polizia da Turitg ch'in da nus ha prendì a chasa, ha fatg la runda a la maisa radunda da l'ustaria dal vitg. Restà è dentant dapli, la vista vers ils basegns da la giuventetgna è sa midada. Ina cultura autonoma ed independenta è s'establida en las citads svizas. Persunalmain dentant han las enconuschientschas dals 30 da matg 1980 e las discussiuns suandantas en l'agen ravugl ed en la publicitad midà empà l'atgna vista sin il mund. Uschia che noss gir cun il VW mellen a Turitg è sta impurtant, schegea ina casualitad.



Il redactor Andreas Cadonau en ils onns 80, in grond fan da reggae e da Bob Marley. MAD